

ኡሩቲ ማጻፋ ጊደ ቆፋ

ኡሩቲ ታሪኬይ ሳሮቴላ ኩሚዳ ታሪኬ፤ ዳናታ ማጻፋን ዮቴቲዳ ማካላንቻታ ዎዴ ሃ ታሪኬዚ ጸፊቲዴሰ። ሞኣቤ ዴሬ ኣሰ ኡሩታ ኢሰራኤል ኣሳፔ ኢሳ ጌላዲሰ። ኢዚ ኣዚናይ ሃይቂን ኢሰራኤል ዴሬ ኣሰ ጊዲዳ ባ ቦሎቴይሰ ኬሂ ማላሊሲዛ ኣማኔቴላ ቤሳዲሰ። ሄሳሶካ ቃሴ ጎዳ ኢሰራኤል ጸሳ ኬሃ ሲቃዲሰ። ዉርሴላን ቤኒ ባ ኣዚና ዳቦታፔ ኢሳ ጌላዲሰ። ሄሳን ኢሰራኤል ቢታን ጌታ ካዎ ጊዲዳ ዳቂቴሰ ማኤ ጊዳናሰ ቃዳ ዴማዲሰ።

ዳናታ ማጻፋን ዲዛ ታሪኬቲ ጸሳ ኣሳይ ጸሳፊ ሃኪዳ ጋሶን ኢሰታ ጋኪዳ ባሻ ቤሴቴሰ። ኡሩቲ ማጻፋን ዲዛ ታሪኬይ ባ ዎዚና ኢሰራኤል ጸሳኮ ዛሪዳ ኢሲ ኣላጋ ማጫሳያ ኣንጄቲዳይሳኔ ኣማኔቲዳ ኢዛ ኣሳፔ ኢሲኔዮ ጊዳ ቆዴታና ዳንዲይዲይሳ ቤሴሰ።

ሃ ማጻፋይ ኦይኪዳ ኩሚዳ ቆፋ

ኦሃማ ኡሩቲራ ቤቴሊሄማ ሲሞ 1:1-22

ቦኤዜራ ኡሩቲ ኤራቴላ 2:1—3:18

ቦኤዜይ ኡሩቶ ማቾ ኤኮ 4:1-22

ኣቢሚሌኬ ቤቴ ቡሰ

¹ ኢሰራኤል ቢታ ዳናቲ ሃሪዛ ዎዴ ሄ ቢታን ኮሻይ ዴንዲዴሰ። ሂሰቲን ኢሳዴይ ባ ማቾኔ ናሞኡ ኣቲማ ናይታ ኤኪዲ ዩሁዳ ዴሬን ዲዛ ቤቴሊሄማ ካታማፔ ዴንዲዲ ሞኣቤ ቢታ ቢዴሰ።

² ሄ ኣዴዛ ሱንሊ ኣቢሚሌኬ፤ ማቼይ ሱንሊ ኦሃሞ፤ * ናሞኡ ናይታ ሱንሊ ማሃሎኔኔ ኬሎኔ ጌቴቴሰ። ኢሰቲ ዩሁዳ ቢታን ቤቴሊሄማ ካታማን ኤፍራታ ዴሬ ኣሰ ጊዲሼ ሞኣቤ ዴሬ ቢዲ ሄን ዴኢዳ።

³ ሄን ዲሺን ኦሃሚ ኣዚና ኣቢሚሌኬይ ሃይቂን ኢዛ ባ ና ናሞኣታራ ጸላ ኣታዲሰ።

⁴ ኢዚ ናይቲ ሞኣቤ ቢታ ማጫ ናይታፔ ኦርፋኔ ኡሩቶ ማቾ ኤኪዳ። ኢሰቲካ ሄን ታሙ ላይሳ ኬና ዴኢዳ።

⁵ ማሃሎኔይኔ ኬሎኔይ ናሞኣቲካ ሃይቂዳ። ኦሃማ ኢዚ ኣዚናይኔ ናሞኡ ናይቲ ሃይቂን ባርካ ኣታዲሰ።

* 1:2 ኦሃሞ ጉሲ ኢብራዊታ ቃላራ ኡፋይሲዛይሳ ጉሳ።

ኑሃማ ኡሩቲራ ቤቴሊሄማ ሲማ ቡስ

6 ኢዛ ሞክሮን ዲሺን ጎዳይ ባ ኣሳ ሞኪ ጸሊዲ ኢስታስ ካል ኢሚዳይሳ ሲያዳ ናይታ ማቼታ ናምኣታ ባናራ ኤካዳ ባ ዳሬ ሲማ ባና ኬዛዱስ።

7 ካሴ ባ ዲዛሶ ዩጋዳ ናይታ ማቼታ ናምኣታራ ኢሲፌ ዩሁዳ ቢታ ኤፊዛ ኦጌን ጌሊዲ ቡስ ዶሚዳ።

8 ሄሳፌ ጉዬ ኑሃማ ባ ናይታ ማቼታ ናምኣታስ፡ «ኢንቴ ዉሪካ ኢንቴ ኣዩኮ ኣዩኮ ሲሚቴ፤ ሃይቁዳ ኢንቴ ኣዚናታሲኔ ታስ ኢንቴ ሎኦ ኦልዳይሳ ጎዳይካ ኢንቴስ ኢዛሶ ኦሶ።

9 ኢንቴ ኢሶይ ኢሶይ ጌላና ኣዚናሶን ጎዳይ ኢንቴስ ዎፓ ኢሞ» ጋዳ ኢስታ ዩራዱስ።

ኢስቲ ባ ቃላ ጶቁ ሂስቲዲ ዩኪዳ፤

10 ቃሴካ ኢስቲካ ኢዚስ፡ «ኑኒ ኔናራ ኔ ኣሳኮ ባና» ጌዳ።

11 ኑሃማ ኢስታስ፡ «ታ ናይቶ ጉዬ ኢንቴሶ ሲሚቴ፤ ኢንቴ ታናራ ኣይሰ ቤቲ? ኢንቴስ ኣዚና ጌዳና ኣቱማ ናይታ ታ ቡሮ ዩላና ኢንቴስ ሚሳቲዜ?»

12 ታ ናይቶ ታኒ ሃራ ኣዚና ጌሎንታ ማላ ኬሃ ጨማዲስ፤ ታኒ ሃቕ ኣዚና ጌላዳ ኣቱማ ና ዩሊዛኮካ።

13 ኢስቲ ዲጪ ጋካናሼ ኢንቴ ኢስታ ናጋኔ? ኢስታ ናጊሼ ኢንቴ ኣዚና ጌሎንታ ጋሞኣኔ? ታ ናይቶ፡ ሄሲ ሃኔና፤ ጎዳ ኩሼይ ታ ቦላ ዴንዲዳ ጊሻስ ሃይሲ ሃ ዮኦይ ኢንቴፌ ቦላራ ታስ ጫሞ» ጋዱስ።

14 ሄሳ ጊሻስ ኢስቲ ባ ቃላ ጶቁ ሂስቲዲ ቃሴካ ዩኪዳ። ሂስቲን ኦርፋይ ባ ቦሎቴዮ ዩራ ኤካዳ ሲማዱስ። ጌዶ ኣቲን ኡሩታ ኢዚፔ ሻኬታና ኮዮንታ ጊሻስ ኢዞ ኢዲማ ኦይካዳ ዩዶንታ ኢጸዱስ።

15 ኑሃማ ኢዚስ ዛራዳ፡ «ቤያ፡ ኔ ኣዚና ኢሻ ማቼያ ባ ኣሳታኮኔ ባ ኤቃ ጸሳታኮ ሲማዱስ። ኔኒካ ኢዚራ ሲማ ባ» ጋዱስ።

16 ጌዶ ኣቲን ኡሩታ ዛራዳ፡ «ታኒ ኔፔ ሻኬታና ማላ ዎይኮ ኔና ኣጋዳ ጉዬ ሲማና ማላ ታና ዋዩሶፓ። ኔኒ ቢዛሶ ኣዋካ ታ ባና፤ ኔኒ ዲዛሶን ኣዋንካ ታ ዳና፤ ኔ ኣሳይ ታ ኣስ ጌዳና፤ ኔ ጸሲ ታ ጸስ ጌዳና።

17 ኔ ሃይቁዛሶን ታ ሃይቃና፤ ሄንካ ታኒ ሞጌታና፤ ሃይቆፔ ኣቲን ሃራይ ታና ኔፔ ሻኬኮ ጎዳይ ታ ቦላ ፒርዶ፤ ሄሳፌካ ቦላራ ሃራ ኢታ ኢዚ ታ ቦላ ኦሶ» ጋዱስ።

18 ኡሩታ ኢዚራ ባናስ ባ ቆፋ ቃቺዳይሳ ኑሃማ ኤሪዳ ዎዴ ባ ጊዛይሳ ኣጋዳ ጮኡ ጋዱስ።

19 ሄሳፌ ጉዬ ናምኣቲካ ቤቴሊሄሜ ጋካናስ ኢሲፌ ቢዳ። ኢስቲ ቤቴሊሄሜ ጋኪዛ ዋዴ ሄ ካታማ ኣሳይ ዉሪ ኢስታ ሃኖታን ማለሌቲዴስ። ቃሴ ማጫሳቲ፥ «ሃና ኑሃሚ?» ጊዳ።

20 ኢዛ ዛራዳ ኢስታስ፥ «ኡባ ዳንዳይዛ ጸሲ ታ ዱሳ ዳሮ ጫሜሊዳ ገሻስ ታና፥ «ጫሞዬ!» ጌቲ ኣቲን፥ «ኑሃሚ» ጎፒቲ።

21 ታኒ ኩሜል ኬዛዲስ ሺን ጎዳይ ታና ሜላ ኩሼ ዛሪዴስ። ጎዳይ ታና ኡንኤሊዴስ፤ ኡባ ዳንዳይዛ ጎዳይ ታ ቦላ ኢታ ሚሽ ጋሊዴስ። ሂስቲን ታና ኣይስ ኑሃሚ ጊ ጸይጌቲ?» ጋዴስ።

22 ሄሳፌ ጉዬ ኑሃማ ባ ና ማሾ ኡሩቲራ ሞኣቤፔ ሲማዱስ። ኢስታ ባንጋይ ማጻ ዶሜቲሺን ቤቴሊሄሜ ጋኪዳ።

2

ፒጼ ሺሻናስ ኡሩቲ ቡስ

1 ኑሃሚስ ኢዚ ኣዚና ኣቢሜሌኬ ባጋራ ዳቦቲዛ ቦኤዜ ጌቲቲዛ ኢሲ ኤሬቲዳ ዴሬ ኣሲ ዴስ።

2 ኢሲ ጋላስ ሞኣቤ ዴሬ ኣስ ኡሩታ ኑሃሞ፥ «ታ ኢዛ ሲንፋን ፑላቲን ታና ፒጼ ሺሻናና ኣስ ዴሚኮ ኣኔ ታኒ ኢዛ ካሊ ማጼቲዛሶ ባይስ» ጋዴስ። ኑሃማካ ዛራዳ ኢዚስ፥ «ኤ ታ ናዬ ባ» ጋዴስ።

3 ሂስቲን ኡሩታ ባዳ ካል ማጺዛ ኣሳ ጉዬፔ ፒጼ ሺሾ ዶማዱስ፤ ኢዛ ፒጼዛ ሺሺዛ ጋዴይ ኣቢሜሌኬ ዳቦ ቦኤዜ ጋዴ።

4 ሄ ዋዴካ ቦኤዜይ ቤቴሊሄሜ ካታማፔ ጋኪ ዋዲዲ ካል ማጺዛ ኣሳ፥ «ጎዳይ ኢንቴስ ዋልቃ ኢሞ» ጊዴስ። ኢስቲካ ዛሪዲ፥ «ጎዳይ ኣንጀ» ጊዳ።

5 ሂስቲን ቦኤዜይ ካል ማጺዛይታስ ካቦዛ፥ «ሃና ናቴፋ ናያ ኦናሪ?» ጊ ኦይቺዴስ።

6 ካቦዚ ዛሪዲ፥ «ሃና ኑሃሚራ ዪዳ ሞኣቤ ዴሬ ማጫ ና።

7 ኢዛ ታና፥ «ካል ማጺዛይታ ጌዶ ካላዳ ሚርቄ ጊዶፌ ዋዲዳ ፒጼ ሺሾ?» ጋዴ ኦይቻዴስ። ሂስታዳ ጉፋ ዋዴ ኩዋታና ሸምፖሪፔ ኣቲን ማለዶፔ ዶማዳ ሃኢ ጋካናስ ፒጸሼ ጋምኣዱስ» ጊዴስ።

8 ሂስቲን ቦኤዜይ ኡሩቶ፥ «ታ ናዬ ሲያ፤ ፒጼ ሺሻናስ ሃራ ኣሳ ጋዴ ቦፓ፤ ቃሴ ሃይሳፌ ኣዋካ ቃጻፋ፤ ታስ ኦሊዛ ማጫ ናይታራ ሃይሳን ፔኣ።

9 ኣቲማ ኣሳቲ ማጸዚዞ ጸላዳ ማጫ ናይታ ካላ፤ ኣዳቲ ኔና ቦቸንታ ማላ ታኒ ኢስታስ ዮታዲስ፤ ኔና ሳሚዛ ጊዲኮ ኣዳቲ ኤሂ ዋሊዳ ሃላፌ ዱቃ ዱቃ ኡያ» ጊደስ።

10 ኡሩታ ባ ሁኤ ቢታ ጋሳ ዚጋዳ፡ «ታኒ ኣሳ ዳሬ ኣስ ጊዲኪና? ኔ ታስ ሚሼታና ማላ ታ ዋና ኔ ሲንፋን ሳባ ደማዲና?» ጋዲስ።

11 ቦኤዜይ ዛሪዲ፡ «ኔ ኣዚናይ ሃይቆሶፔ ኔኒ ኔ ቦሎቴይስ ኦሊዳ ሚሽ ኡባ ታ ሲያዲስ። ቃሴ ኔኒ ኔ ኣዮ፡ ኔ ኣዋኔ ኔ ዬሌቲዳ ቢታ ኣጋዳ ሃይሳፌ ካሴ ኔ ኤሮንታ ዳራራ ዳናስ ዬዳይሲ ታስ ዮቴቲዳስ።

12 ኔኒ ኦሊዳይሳ ኩሼ ጎዳይ ኔስ ዛሮ። ኔኒ ኢዛ ቁፌ ጋርሳን ኣታናስ ዬዳ ጎዳ ኢስራኤሌ ጸሳይ ኔስ ዳኮ ኢሞ» ጊደስ።

13 ኡሩታ፡ «ታ ጎዳ፡ ታ ፑላቴሊ ኔ ሲንፋን ጉጃቲ ጉጃቲ ቢደስ፤ ታኒ ኔ ኦሳንቻታፔ ኢሲኔይ ማላ ጊዲኬ ሺን ኔ ታስ ሎኦ ሃሳያዳ ታና ኬሃ ሚንፊላዳሳ» ጋዲስ።

14 ቁማ ሚሺን ቦኤዜይ ኢዞ፡ «ሃ ሺቃ፤ ኡኬላ ኤካዳ ኡስታራ ማ» ጊደስ፤ ሂስቲን ኢዛ ካሐ ማጸዚይታራ ሺቃ ኡታዲስ፤ ሂስቲዲ ኢዚስ ቲያ ሃላሃስ ኢሚደስ፤ ኢዛ ካላናሼ ጋካናስ ማዲስ፤ ቁማዚካ ፓላሂደስ።

15 ቃሴካ ኢዛ ፒጼዛ ሺሻናስ ዳንዲዛ ዋዴ ቦኤዜይ ባ ኦሳንቻታ፡ «ሚርቁዛ ጋርሳፌካ ኢዛ ቆሪኮ ኢዞ ዬላቸፍቲ።

16 ሚርቁዛፔካ ሾዲዲ ኢዚስ ዬጊኮ ኢዛ ቆሩ፤ ኢዞ ሃንቆፍቲ» ጊደስ።

17 ሄን ኡሩታ ኦማርስ ጋካናስ ፒጼዛ ዛምኢን ታሙ ኪሎ ጊዳናዚ ኬዚደስ።

18 ኢዛ ሄ ካላ ባኣ ኤካዳ ካታማ ሲማዲስ፤ ኣይ ጊና ካሐ ሺሺዳኮ ኢዚ ቦሎቴያ ቤኣዲስ፤ ቃሴካ ኡሩታ ካሴ ሚሺን ቲርፒ ኣቲዳይሳ ኢዚስ ኬሳ ኢማዲስ።

19 ሂስቲን ኢዚ ቦሎቴያ ኢዞ፡ «ሃች ኣዋን ፒጸ ፔኣዲ? ኣዋን ኦላ ፔኣዲ? ኔስ ሃይሳ ኪያ ኦሊዳይሲ ኣንጃቶ» ጋዲስ።

ሂስቲን ኡሩታ ኦናስ ኦላ ፔኢዳኮ ባ ቦሎቴይስ፡ «ታኒ ሃች ፒጸሼ ፔኢዳ ጋዴ ጎዳይ ቦኤዜ» ጋ ዮታዲስ።

20 ኦሃማ ባ ናዛ ማቺይስ ባ ሎኤቴላ፡ «ሃይቁዳይታ ቦላኔ ፓጻ ዲዛይታ ቦላ ሎኦ ኦሶ ኣጎንታ ጎዳይ ኢዛ ኣንጀ» ጋዲስ። ካሌላዳካ፡ «ሄ ኣዳዚ ኦስ ኣሾ ዳቦ፤ ኦና ላቲ ኣይሳናስ ቤሲዛ ኣሳፔ ኢሶይ ኢዛ» ጋዲስ።

21 ቃሴካ ሞክሴ ዴሬ ኣሰ ኡሩታ፡ «ኢዚ ታና፡ ታ ካፋ ማጺ ወርሳናሹ ጋካናሰ ታ ኦሳንቻታፕ ሻኬቶንታ ፒጸ» ገደሰ።

22 ኦሃማ ባ ናዛ ማቾ ኡሩቶ፡ «ታ ናዬ፡ ሄሲ ኔሰ ሎኦ፤ ማጫ ኦሳንቻ ኢዛይታራ ቡሲ ኔሰ ሎኦ፤ ጋሶይካ ሃራ ኣሳ ጋዴ ኔ ቢኮ ኣዴቲ ኔና ቦቻና» ገደሰ።

23 ሄሳ ጊሻሰ ኡሩታ ቦኤዜ ማጫ ኦሳንቻታኮ ሺቃዳ ባንጋይኔ ጊሰቲይ ማጼቲ ዉራና ጋካናሰ ፒጸሹ ጋሞኣዲሰ። ቃሴ ባ ቦሎቲይራ ኢሲፌ ዴኣዲሰ።

3

ኡሩቲ ጌሎ

1 ኢሲ ጋላሰ ኦሃማ ባ ናዛ ማቾኦ ኡሩቶ፡ «ታ ናዬ ኔ ሎኦ ዲሰ ዳና ማላ ታ ኔሰ ኮያናሰ ቤሴኔ?»

2 ኔኒ ኢሰታራ ጋሞኢዳ ማጫ ኦሳንቻቲ ኢዛሰ ኪቲቲዛ ቦኤዜይ ኦና ኣሾን ላቲዛ ዳቦ። ሃ ሲያ፡ ኢዚ ሃቾ ኦማርሰ ባሌን ባንጋ ቡካና።

3 ኔኒ ሜጩታዳ፡ ሺቶ ቲዬታዳኔ ሎኦ ማይኦ ማይኣዳ ኢዚ ቡኪዛ ባሌ ባ፤ ጊዶ ኣቲን ባዳ ቦኤዜይ ሚዲኔ ኡዬዲ ሲማና ጋካናሰ ኢዛ ኣይፌን ቤቶፋ።

4 ኢዚ ኢቺዛሶ ሎኤፋ ጸላዳ ኢዛሰ ቶሆሶራ ኣፋላ ቃራዳ ኢዛ ቶሆሶን ኢቻ፤ ሄሳፌ ጉዬ ኔ ሃናናይሳ ኢዚ ኔሰ ኮታና» ገደሰ።

5 ሂሰቲን ኡሩታ፡ «ኔ ጊዳይሳ ኡባ ታ ኦላና» ገደሰ።

6 ሄሳ ጊሻሰ ኡሩታ ዱጌ ባሌዛ ባዳ ኢዚ ቦሎቲያ ኢዚሰ ኮቲዳይሳ ኡባ ኦላዲሰ።

7 ቦኤዜይ ሚ ኡዬዲ ኡፋዬቲዳፕ ጉዬ ካፋ ዶሬ ኣቻን ኢቺዳሰ፤ ሂሰቲን ኡሩታ ሎዳራ ኢዛኮ ሺቃዳ ኢዛ ኣፋላ ቶሆሶራ ቃራዳ ቶሆሶን ኢቻዲሰ።

8 ጊዲ ጊዶፋ ጊዲሺን ኢሲ ሚሺ ኣዳዛ ዳጋንፊን ኢዚ ሺሬቲሺን ኢሲ ማጫሲ ኢዛ ቶሆሶራ ኢቺዳሮ ዴሚዳሰ።

9 ኢዚካ ኢዛ፡ «ሃኔ ኔ ኦኔ?» ጊ ኦይቺን ኢዛ፡ «ታኒ ኔ ኦሳንቻኦ ኡሩቶ፤ ታና ላታና ቤሲዛ ማታ ዳቦይ ኔና ጊዲዳ ጊሻሰ ኔ ማይኦ ማጫራ ታና ማይዛ» ገደሰ።

10 ቦኤዜይ ዛሬዲ፡ «ታ ናዬ፡ ጎዳይ ኔና ኣንጃ! ሃይሳፌ ካሴ ኔ ኦሶይሳፌ ሃኢ ኔ ኦሶይሲ ኣዴሰ። ዱሬ ጊዲን ዋይኮ ማንቆ ዬላጋ ኣቱማ ኮሹ ባቤካ።

11 ሃኢካ ታ ናዬ ባቦፋ፤ ኔኒ ኦይቺዳይሳ ኡባ ታ ኔሰ ኦፋና፤ ጋሶይካ ታ ዳሬ ኣሳይ ዉሪ ኔኒ ሎኦ ሃኒዛ ማጫሰ ጊዲዳይሳ ኤሬሰ።

12 ታኒ ላታ ዳቦ ጊዲኮካ ኔና ላታናሰ ታፔ ማቲዛ ሃራ ዳቦይ ዳሰ።

13 ሃኢ ሃይሳን ኣቃ፤ ቢታኔዚ ኔና ላታና ኮይኮ ሎኦ፤ ኢዚ ኔና ላታና ኮዮንታ ኣጊኮ ታ ኔሰ ጎዳን ጫቃይሰ ታ ላታ ኤካና፤ ጋዴይ ዋንታና ጋካናሰ ሃይሳን ኢቻ» ጊዳሰ።

14 ሄሳ ጊሻሰ ኡሩታ ጋዴይ ዋንታና ጋካናሰ ኢዛ ቶሆሶን ኢቻዲሰ፤ ቦኤዜይ፡ «ማጫሲ ካፋ ባሌ ዪዳይሳ ኦኒካ ኤርፖ» ጊዳ ጊሻሰ ኡሩታ ኣሲ ኣሰ ሻኪ ኤርንታ ሳቴን ኮይርታ ዳንዳዲሰ።

15 ቦኤዜይ ኢዞ፡ «ኔ ቦላራ ማይኢዳ ማይኦዛ ሃ ቤሳ» ጊዳሰ። ኢዛ ቤሰን ናምኡ ታሙ ኪሎ ጊዲዛ ባንጋ ማኪ ቆሊዲ ኢዞ ባኢሲዳሰ። ኢዛካ ባኣዳ ካታማ ባዲሰ።

16 ኡሩታ ባ ቦሎቴይኮ ቢን ኦሃማ ኢዞ፡ «ታ ናዬ ኔ ቢዳ ዮኦይ ዋኒዳ?» ጋ ኦይቺን፡ ኡሩታ ቦኤዜይ ኢዚሰ ኦላዳይሳ ኡባ ዮታዲሰ፤

17 ቃሴካ፡ « ኒህ ቦሎቴይኮ ማላ ኩሼ ቦፓ ጊዲ ሃይሳ 20 ኪሎ ባንጋ ታሰ ኢሚዳሰ» ጋዲሰ።

18 ኦሃማካ ኢዞ፡ «ታ ናዬ፡ ቡሮ ኣዚ ሃናናኮ ኤሬታና ጋካናሰ ናጋሻ፤ ኣዳዚ ዮኦዛ ሃቶ ዉርሶንታ ሼምፔና» ጋዲሰ።

4

1 ቦኤዜይ ካታማ ፔንጌ ኣቻን ዲዛ ዱቡሻ ኬዚዲ ሄን ኡቲዳሰ። ኢዚ ኡቲ ዲሺን ኢዚ ካሴ ኢዛ ጊሻሰ ዮቲዳ ላታ ዳቦይ ሄራ ኣጳዳይሳ ቤኢዲ፡ «ታ ኢሻዉ! ሃ ሲማዳ ሃይሳን ኡታ» ጊን ኣዳዚ ሲሚዲ ኡቲዳሰ።

2 ቦኤዜይ ሄ ካታማ ጨማታፔ ታሙ ኣሳታ ዳይጊዲ፡ «ሃይሳን ኡቲቴ» ጊ ኡቲሲዳሰ።

3 ሄሳፌ ጉዬ ቦኤዜይ ላታሰ ቤሲዛ ማታ ዳቦዛሰ፡ «ሞኣቤ ቢታፌ ሲማ ዪዳ ኦሃማ ኦ ኢሻ ኣቢሜሌኬ ጸንጾ ጋዴዛ ባይዛና ጋወሰ።

4 ኔ ሄሳ ኤራና ማላ ታ ቆፒዳ ጊሻሰ ሃኢ ሃይሳን ዲዛ ኣሳ ሲንፋኒኔ ታ ዳሪ ጨማታ ሲንፋን ጋዴዛ ኔ ሻማና ማላ ታ ኔና ቆፍሳና ኮያዲሰ፤ ኔ ዋዛና ኮይኮ ዋዛናሰ ዳንዳያሳ፤ ኔፔ ካሴታናሰ

ቤሲዛ ሃራ አሲ ዴና፤ ኔ ሄሳ ኦሶንታ ኣጊኮ ኔፔ ካሊዲ ታሰ ቤሲዛ ጊሻሰ ታ ኡራና ማላ ታሰ ዮታ» ጊዴሰ።

ኣዴዚካ ኢዛሰ፡ «ታ ዋዛና» ጊዴሰ።

⁵ ሄሳፌ ጉዬ ቦኤዜይ፡ «ሂሰቲኮ ኔኒ ጋዴዛ ኦሃሚፔኔ ሞኣቤ ኣሰ ኡሩቲፔ ኔ ዋዚዳ ጋላሰ ሃይቂዳይሳ ሱንሒዛ ቢታን ዴይጊሳናሰ ኢዛ ማቺዮካ ኤካ» ጊዴሰ።

⁶ ሂሰቲን ሄ ማታ ዳቦዚካ ዛሪዲ፡ «ሄሳ ማላ ጊዲኮ ታ ጸንጾ ሜቶን ዴጋናሰ ኮዮንታ ጊሻሰ ታ ዋዛናሰ ዳንዳይኬ፤ ኔ ዋዛ» ጊዴሰ።

⁷ ቤኒ ዋዴ ኢሰራኤሌ ቢታን ኦኒካ ባ ኣቆ ዋዛና ኮይኮ ዋይኮ ሃራሰ ኣሒ ኢማና ኮይኮ ሄ ዮኦዚ ሚናና ዳንዳይዛይ ናሞኣፌ ኢሰይ ባ ጫማ ቶሆፔ ሾዲዲ ሃንኮይሳሰ ኢሚኮ ሃኔሰ። ኢሰራኤሌ ቢታን ሻማ ጊዲን ዋይኮ ባይዞ ጊዲን ዮኦይ ሚኒዛይ ሄሳ ማላና።

⁸ ሄሳ ጊሻሰ ላታሰ ቤሲዛ ማታ ዳቦዚ ቦኤዜሰ፡ «ኔ ዋዛ» ጊዲ ባ ጫማዛ ቶሆፔ ሾዲ ኢሚዴሰ።

⁹ ቦኤዜይ ጨማታሲኔ ዴሬ ኡባሰ፡ «ታኒ ኣቢሜሌኬ ኣቆታኔ ኢዛ ናይታ ኬሎኔኔ ማሃሎኔ ኣቆታ ኡባ ኦሃሚፔ ሻሚዳይሳሰ ሃቕ ኢንቲ ወሪካ ማርካ።

¹⁰ ቃሴ ሃይቂዳይሳ ሱንሒ ኢሰታሶ ኣሳ ሱንሓ ጊዶፌ ዋይኮ ካታማ ኣሳ ማዘጋገባፔ ቆዮንታ ማላ፡ ኢዛ ሱንሒ ኢዛ ጸንጾ ጋዴን ዴይጊታና ማላ ሞኣቤ ዴሬ ማጨሲዮ ማሃሎኔ ማቕ ኡሩቶ ታ ኤካዲሰ፤ ሄሳሰካ ሃቕ ኢንቲ ማርካ» ጊዴሰ።

¹¹ ሄሳፌ ጉዬ ካታማ ፔንጌ ዱቡሻን ዲዛ ጨማቲኔ ኣሳይ ወሪ፡ «ኤ፡ ሃይሳሰ ኦኒ ማርካ! ጎዳይ ሃኖ ኔሶ ዩዳ ማጨሳዮ፡ ኢሰራኤሌ ኣሳሰ ኢሲፌቲላን ኦሒዳ ኤራሂሊ ማላኔ ሊያ ማላ ኦሶ። ኔኒካ ኤፍራታን ዱሬ ኣሰ ጊዳ፤ ኔ ሱንሒ ቤቴሊሄሜን ኤሬቶ።

¹² ጎዳይ ኔ ኬላ ሃ ሎኦ ዩላጋ ማጨሳይፌ ኔሰ ኢሚዛ ዜሬላን፡ ቲኢማራ ዩሁዳሰ ዩሊዳ ፓሬሴ ኬላ ኣሳ ማላ ኦሶ» ጊዴሰ።

ዳዊቲ ዩሌታ ዛርኬ

¹³ ሄሳ ጊሻሰ ቦኤዜይ ኡሩቶ ማቕ ኤኪዴሰ፤ ጎዳይ ኢዚሰ ዩሎ ኢሚን ኣቲማ ና ዩላዲሰ።

¹⁴ ማጨሳቲካ ኦሃሞ፡ «ሃቕ ኔና ላታናሰ ማታ ዳቦ ቆይሶንታ ጎዳይ ጋላቲቶ!

15 ናዚ ኔ ሱንላ ኦራጺሳና! ኔ ጨሚሺንካ ኢዚ ኔና ሄማና፤
ጋሶይካ ኔና ሰቂዛራ ላፑን ኣቱማ ናፔካ ኣጂዛራ ኔ ናዛ ማቼያ
ኢዛ ዩላዱስ» ጊዳ።

16 ሄሳፌ ጉዩ ኮሃማ ቄሪ ናዛ ኤካ ኢዲማዱስ፤ ሂሰታዳ ኢዛ
ሎኣላ ዲቻዱስ።

17 ኢዚ ጉታን ዲዛ ማጫሳቲ፥ «ኮሃሚስ ኣቱማ ናይ
ዩሌቲዳስ» ጊዳ፤ ኢዛ ሱንላካ ኢዮቤዴ ጊዳ። ኢዚ ዳዊቲ ዩሊዳ
ኢሴዩ ኣዋ።

18 ፓሬሴ ሶ ኣሳ ዩሌታይ ሃይሳፌ ካሊ ዲዛይሳ፤ ፓሬሴይ
ሄጺሮማ ዩሊዳስ፤

19 ሄጺሮማይ ኣራማ ዩሊዳስ፤ ኣራማይ ኣሚናዳቤ ዩሊዳስ፤

20 ኣሚናዳቤይ ኔኣሶኔ ዩሊዳስ፤ ኔኣሶኔይ ሳልሞኔ ዩሊዳስ፤

21 ሳልሞኔይ ቦኤዜ ዩሊዳስ፤ ቦኤዜይ ኢዮቤዴ ዩሊዳስ፤

22 ኢዮቤዴይ ኢሴዩ ዩሊዳስ፤ ኢሴዩይ ዳዊቲ ዩሊዳስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b